

Buesak EHUren «kontrolik ezarekin» justifikatu zuen aurrekontua Leioan

Goirienak «konfidantza» eskatu eta diru eskasia salatu zuen atzoko bileran

Fernando Buesak EHUko Kontseilu Sozialean atzo egindako agerraldiak ez zuen emaitza zehatzik ekarri diru gatazkari irtenbidea emateko orduan. Hezkuntza sailburuak EHUko «kontrol eza» argudiatu zuen aurrekontuak justifikatzeko. Errektoreak, berriz, konfidantza eskatu eta aurrekontuen eskasia azpimarratu zuen.

G. ACIRRE / BILBO

Fernando Buesa Eusko Jaurlaritzako lehendakariorde eta Hezkuntza kontseilariak ekimen propioz eskatu zuen EHUko Kontseilu Sozialean agertzea Hezkuntza Sailak Unibertsitatearen esparruan aurrera daraman politika azaldu eta aurtur EHUrentzat bideratutako aurrekontuen arrazoiak berri emateko.

Lekukorik gabe izan zen Kontseilu Sozialaren bilera goizeko hamabietan hasi zen Leioako Errektoretzan. Bi ordu t'erdia iraun zuen bileran ez zuten EHUko aurtengo aurrekontuen arazoa konpontzeko irtenbiderik zehaztu.

Buesak aurreko urteetako EHUren gestio eta administrazio sistema eza azpimarratu zituen aurtengo aurrekontuak justifikatzeko. Ildo beretik, ezinbestekotzat jo zuen EHUko premien azterketa bat egitea.

«EHUK orain arte ezin izan du ekitaldi bakar bat itxi datu fidagarriekin. Ondorioz denok hartu behar dugun lehen konprometua kontrol sistema bat ezartzea da, EHUK zenbat eta zertan gastatzen duen jakin ahal izateko eta horren arabera, etorkizunean EHU beharrezko diruz hornitzeko», gehitu zuen Buesak.

1992. urtean EHUren beharritza-nei aurre egiteko errekurso nahikoak daudela esan zuen sailburuak. «Unibertsitateko gastuaren sostengua % 8,2an igo da. Bakoitzak erabaki dezake gutxi ala asko den, baina ezin daiteke esan % 1,2koa izan denik. Bestetik, EHUK badu dirua no ordaintzeko, presupostua 19.000 milioi pezetakoa da eta nominak ez dira heltzen 14.000 milioira».



Fernando Buesa —ezkerrean— eta Juan Jose Goiriena —eskuinean— atzo Leioan.

KONFIDANTZA ETA LAGUNTZA ESKE

Juan Jose Goirienna de Gandarias EHUko errektoreak, berriz, konfidantza eta erakunde laguntza eskatu zuen Unibertsitate dagoen egoeratik atera ahal izateko. «Unibertsitatearen gestioa hobetzeko esfortzuak egiten ari gara, baina erakunde laguntza ezinbestekoa da aurkitu dugun egoera gainditzeko».

Eusko Legebiltzarrean agertzeko eskakizuna baieztatu zuen Goirienna de Gandarias aurrekontuaren eskasia azpimarratu zuen. Errektoreak EHUren gabeziak aipatu zituen, AZP eskasia, ikasgela falta, teilatu eta errepedeen egoera txarra eta abar. «Unibertsitateak ezin ditu premia hauek konpondu diruz hornitzen ez badute».

Iturri berberak esandakoaren arabera, EHUko gastua «malgutasunik gabekoa da», «aurrekontuen % 70-80 konprometitua bait dago, plantilan edo obretan. Espero dut Hezkuntza saila EHUren premiez jabetzea, tentsioa bestela nahitahiezkoak izango direlako eta EHUK arazoak izango lituzkeelako dauden programak garatzeko».

AUZITEGI NAGUSIAREN EPAIA

Azkenik, EAEKO Auzitegi Nagusiak herenegun kaleratu zuen epaiaren arabera, Gipuzkoako lan kontratadun 47 irakasleak EHUK kaleratu ezik, beraien kontratuak «bertan behera gelditu» ziren.

Lan kontratadun irakasleek ez zuten atzo adierazpenik egin epaiari

buruz, astelehenean bilduko bait dira asanbladan Donostian eta ordurarte ez dute baloraziorik egingo.

Errektoreak, astearteko errektoregoaren bilera bukatu arte ez zuen honetaz hitzegun. Hala ere, Goirienna bere taldeak «irakaslearen egonkortasunaren» alde egiten duen apostua aipatu zuen eta irakasleekin izan dituzten negoziaketak ere.

Osasuna

Azkuna: «Eusko Jaurlaritzak ez du ospitale gehiagorik egingo»

BILBO

Eusko Jaurlaritzak ez du ospitale gehiagorik eraikiko Inaki Azkuna Eusko Jaurlaritzako Osasun sailburuak atzo Zornotzan aditzera eman zuenez. Gasteizko gobernuak, aldiz, hobetu egingo ditu orain dauden eritxteen zerbitzuak. Oinarritzako osasun sarea ere indartuko duela adierazi zuen kontseilariak. Azkunak bere sailak legebiltzar honetan izango di-

tuen lehentasunen berri eman zuen bizkaiko herri honetako Osasun Zentruaren inaugurazioan. «Geroan diru mordera gastatu beharko dugu teknologia berrian. Hau dela eta, aukeratu egin beharko dugu: itsu itsuan eraikitzea ala oraingo errekursoak hobetu eta erabiltzea, guk egingo duguna, hain zuzen» esan zuen EAEko osasun arduradunak.

Azkunak esan zuenez, «gurea herri txikia da, autopisten bidez ondo komunikaturik. Beraz, ez da beharrezkoa ospitale kopurua handia izatea». Lehen aipatu bezala, «EAEan eraikitzen ari diren hogeitabost osasun zentruak eta zentru berri batzuk egiteari ekitea» dira Jaurlaritzaren lehen helburua. Azkunak esan zuen moduan, 2.500-3.000 milioi pezetako dirutza dauka xede honetarako.

Sailburaren arabera, ondoko hilabeteetan sei zentru berri inauguratuko dituzte eta urte amaierarako beste hiruzpalau gehiagok irekiko dituzte ateak. Kontseilariak onartu egin zuen hiriburuak «oinarritzako sare ona» izan ez dutela. Arazoa konpontzeko «gero eta osasun zentru gehiago ipintzen ari dira leku haue-» zehaztu zuen.

LABURREAN

HILDAKO bat traktore batek harrapatu ondoren Ikaztegietan

Jose Manuel V. hogeitamabi urteko gizonetako hil egin zen atzo Ikaztegietan —Gipuzkoa— traktore batek harrapatu zuenean. Ezbeharra eguerdiko hamabi t'erdia inguru zirenean gertatu zen. Ertzaintzak emaniko datuen arabera, traktoreak azpian harrapatu zuen Jose Manuel V. eta berehala hil zen.

HILDAKO bat Bilbo-Gasteiz autobidean


F.Z.V. hil zen atzo goizeko zortzietan Bilbo-Gasteiz autobidean auto istripu baten ondorioz. Bilbon bizi eta hogeitameretzi urte zituen hildakoa. Aiurdieneko tunelean izan zen istripua, bere kotxea errepedetik atera eta tuneleko hezia zein paretaren kontra jo zuenean. SOS Deiaren informazioen arabera, izotz plaka batek eragin zuen ezbeharra.

NAFARROAKO talde ekologistek errekurtsioa jarri dute

Gorosti, Eguzki, Lizarraldeko asanblada ekologista, EKI, Anat-Lane eta Landazuria talde ekologistek atzo goizean jarri zuten iragarritako Errekurtso Kontentzioso-Administratiboa Gobernuak ateratako ehiza kontrapasan baimentzen zuen Foru Dekretuaren aurka. Errekurtsoan, Dekretua derogatzeaz gain, Nafarroako administrazioa zigortzea eskatzen dute, basoko fauna babesten duen 4/89 Legearen aurka egiteagatik. Beraien ustez, Lege hau da Gobernuak ehiza egitean jartzen dituen zigorrak justifikatzeko erabiltzen duena.

VITAL Kutxaren zaharrentzako egoitzak udal sarera

Los Herran, Ariznabarra eta Landazurin Vital Kutxak dituen zaharrentzako egoitzak Gasteizko Udalaren sarera pasatzeko konbenioa sinatu zuten atzo Jose Angel Cuerda alkatea eta Francisco Allende Vitaleko lehendakariak. Gaur gero, egoitzetako kudeaketa Udalar dagokio eta langileak ere udal sarean sartuko dituzte. Vital Kutxak zaharren gaietarako 30 milioi pezeta erabiliko ditu.



GIPUZKOAKO GOZOGILEAK

Euskaldunon Egunkariaren urteurreneko festa tarta erraldoi batekin gozotu zuen Gipuzkoako Gozogile Artisauen Gremioak, 1992 urte ezti eta zoriontsua opa die Euskaldunon Egunkariako irakurle guztiei.